

Communiqué

Duerch déi héich Inflatoun huet d'europäesch Zentralbank de Leetzëns an d'Luucht gesat an domat och Zënsen op de variablen Haus- an Appartementsprêten. D'Leit kréien honnerten Euro méi all Mount ze bezuelen a vill Stéit kënnen dës Laascht net droen.

Wann eng Koppel haut 1.000.000 € léine geet, bezilt se ronn 38.500 € Zënsen am éischte Joer. Et dierf een als Koppel awer nëmmen 2.000 € pro Persoun vun de Steieren ofsetzen. Op 30 Joer bezilt een op de ganze Prêt 718.500 € Zënsen bei engem Zënsaz vun 3,85%. Den Ënnerscheid tëscht dem Undeel, deen een haut kann ofsetzen an deen ee virun 2 Joer bei 1,8% Zënse konnt ofsetzen, huet sech méi wéi hallwéiert. Aaneschters gesot: et muss een haut vill méi Zënsen bezuelen wéi virun zwee Joer, mee et kann een awer net méi Zënsen vun de Steieren ofsetzen.

Dofir hate d'Piraten-Deputéiert Marc Goergen a Sven Clement schonn am Oktober eng Motioun an der Chamber deposéiert, fir den Undeel un Zënsen ze verduebelen, déi ee fir säin Immobilieprêt op sengem Éischtwunnsätz dierf ofsetzen. Dës Propose gouf vun de Majoritéitsparteien DP, LSAP an déi Gréng ofgeleent.

Eis Propos géif iwwert déi nächst 30 Joer zu enger zousätzlecher Entlaaschtung vun 49.000 € pro Persoun an engem Haushalt bäidroen.

Date d'occupation de l'habitation	avant 1/01/2012	entre le 31/12/2011 et le 1/1/2017	après le 31/12/2016
Plafond déductible par personne	1.000 €	1.500 €	2.000 €
Propose Piraten	2.000 €	3.000 €	4.000 €

Mir Piraten sti weider zu dëser Fuerderung, déi an der aktueller Wunnungskris dréngend ass. Doriwuer eraus muss d'Politik elo schnell weider Mossnahmen ëmsetzen, fir d'Leit am Land net an d'Situatioun kommen ze loossen, dass si hiert Doheem musse verkafen, well si sech de Prêt net méi leeschte kënnen.

